

BOSNA I HERCEGOVINA
FEDERACIJA BOSNE I HERCEGOVINE
SREDNJOBOSANSKI KANTON/KANTON SREDIŠNJA BOSNA

KANTONALNI SUD U NOVOM TRAVNIKU

Broj: 51 0 Mal 053193 22 Gž

Novi Travnik, 24.05.2022. godine

Kantonalni sud u Novom Travniku, u vijeću sastavljenom od sudija Alme Islamović, kao predsjednice vijeća, Nijaza Krnjić i Stane Imamović, kao članova vijeća, u pravnoj stvari tužitelja JKP Bašbunar Travnik iz Travnika, protiv tuženog M.DŽ. iz T., ..., radni naplate, vrijednost spora 331,79 KM, odlučujući o žalbi tužitelja izjavljenoj protiv rješenja Općinskog suda u Travniku broj: 51 0 Mal 053193 21 Mal 2 od 03.09.2021. godine, u sjednici vijeća održanoj dana 24.05.2022. godine, donio je slijedeće:

RJEŠENJE

Žalba tužitelja se odbija kao neosnovana i potvrđuje rješenje Općinskog suda u Travniku broj: 51 0 Mal 053193 21 Mal 2 od 03.09.2021. godine.

Obrazloženje

Rješenjem prvostepenog suda odbačena je tužba od 13.02.2019. godine u ovoj pravnoj stvari.

Protiv navedenog rješenja žalbu je blagovremeno izjavio tužitelj iz razloga što je u dispozitivu predmetnog rješenja navedeno da se tužba tužitelja odbacuje, sa prijedlogom da se rješenje ukine i nastavi postupak u ovoj pravnoj stvari.

Nije bilo odgovora na žalbu.

Nakon što je ispitao rješenje prvostepenog suda u granicama navoda iz žalbe i po službenoj dužnosti shodno odredbama člana 221. i člana 236. Zakona o parničnom postupku Federacije BiH („Službene novine Federacije BiH“, broj: 53/03, 73/05, 19/06 i 98/15), ovaj sud je odlučio kao u izreci iz slijedećih razloga:

Žalba je neosnovana.

Iz stanja spisa proizlazi da je tužilac prvostepenom sudu dana 13.02.2019. godine podni tužbu protiv tuženog, radi isplate duga u iznosu od 331,79 KM. Postupajući po tužbi sud je pokušao dostaviti istu na odgovor tuženom na adresu iz tužbe, ali je tužba vraćena sudu uz naznaku da je tuženi „umro“. Prvostepeni sud je izvršio uvid u sudski spis broj 51 0 O 166098 19 O gdje je utvrdio da je tuženi preminuo dana 25.09.2016. godine, dakle prije podnošenja tužbe. Iz navedenih razloga prvostepeni sud je odbacio tužbu u ovoj pravnoj stvari.

Kod ovakvog činjeničnog stanja pravilno je postupio prvostepeni sud kada je donio odluku kao u izreci ožalbenog rješenja. Ovo iz razloga što prema odredbi člana 291. stav 1. ZPP-a stranka u postupku može biti svaka fizička i pravna osoba, a prema odredbi člana 293. stav 3. istog zakona, sud će u toku cijelog postupka po službenoj dužnosti paziti može li osoba koja se pojavljuje kao stranka u postupku biti stranka u postupku. Prema odredbi člana 295. stav 1. ZPP-a kada sud utvrdi da osoba koja se pojavljuje kao stranka ne može biti stranka u postupku, a taj se nedostatak može otkloniti, pozvat će tužitelja da izvrši potrebne ispravke u tužbi ili će poduzeti druge mjere da bi se postupak mogao nastaviti sa osobom koja može biti stranka u postupku, a prema stavu 4. istog člana ako se nedostaci iz stava 1. i 2. ne mogu otkloniti ili ako određeni rok bezuspješno protekne, sud će ukinuti radnje prevedene u postupku, ako su zahvaćene tim nedostacima i odbaciti tužbu, ako su nedostaci takve prirode da sprečavaju dalje vođenje parnice. Kako je sud utvrdio da je tužitelj kao stranku tuženog označio fizičko lice koje ne može biti stranka u postupku, a koji je preminuo prije nego što je tužitelj podnio tužbu sudu, to je pravilno postupio kada je tužbu odbacio. Ovdje se radi o nedostatku koji se ne može otkloniti, jer je označeni tuženi u tužbi umro prije podnošenja tužbe i ne može imati svojstvo stranke u postupku, obzirom da je smrću dana 18.09.2019. godine izgubio pravnu i poslovnu sposobnost prije podnošenja tužbe sudu. Ovakav pravni stav zauzeo je i Vrhovni sud Federacije BiH U svoj odluci broj 65 0 P 535313 16 Spp od 23.09.2016. godine a koje glasi: „Da je smrt stranke prije utuženja nedostatak koji se ne može otkloniti i da se tužba u svakom slučaju treba odbaciti bez pozivanja na uređenje“. Zato je žalba tužitelja neosnovana pa je i ovaj sud kao takvu odbacio i potvrdio prvostepeno rješenje.

Zbog svega izloženog, ovaj sud je primjenom odredaba člana 235. stav 1., tačka 2. Zakona o parničnom postupku, odbio kao neosnovanu žalbu tužitelja i potvrdio rješenje prvostepenog suda.

Predsjednica vijeća
Alma Islamović

